

TRAYECTO MUSICAL DI HARRY RODRIGUEZ

(q.e.p.d.)

Na edad relativamente hoben, Harry Rodriguez a cuminsa su trayecto musical como drummer, formando parti di e grupo "Hapcats". El a fungi como drummer di e banda "Los Principes" pa hopi aña y durante añanan 60 el a deleita publico cu su talento musical como bahista, na Aruba den Bali Bar di Aruba Caribbean Hotel, formando parti di un banda procedente di New York. Harry hunto cu algun musico talentoso despues a lanta e banda "Poder Latino" den cual banda e tabata domina conga. Tabata dia 4 di April 1980, hunto cu varios musico conoci y talentoso di ultimo 18 aña, Harry a forma parti di e banda "Musical Time" cu tabata e banda di "Decada

80" riba nos isla. Harry tabata un di e pilaman di e banda aki y na mes momento tata musical di e integrantenan, aunque hopi biaha e hobennan tabata yame cariñosamente "bieuw" pero semper a duna respet y razon. Harry por ehemplo tabata encarga cu disciplina diario di e agrupacion tan exitoso den temporada di carnaval y internacional.

Cu otro palabra Harry tabata dedica hopi di su tempo na bienestar di e integrantenan y bon funcionamiento di e banda "Musical Time" cu a conduci na e tantísimo exitonan. A duel Harry masha hopi ora cu e "Banda di decada" no por a sigui cu

nan trayecto musical exitoso.

Segun Elgin Juddan, Director Musical di "Musical Time", ta pesey nos di MT kier haci un apelacion na henter mundo farandulero, fanatico musical y en especial fanaticonan di Musical Time, pa asisti na entiero di Harry Rodriguez diasabra na misa catolico Sta. Teresita na San Nicolas entre 2 or y 4 or atardi pa nos por dune su ultimo aplauso y bise: "Harry nos ta off awe!~" Riba e portretnan por mira "Poder Latino (Latin Power)" cu Harry para tras di e quinto na man drechi, Harry tocando su tambor y cu Musical Time por mira Harry na man drechi sinta tocando su conga.



SOCOTORO DI AYERA TA YORA HARRY RODRIGUEZ AWE

Mañan e musico, Harry Rodriguez ta ser hiba pa su ultimo lugar di sosiego.

Un musico cu un trayectoria di 45 aña sigur y den transcurso di añanan a desaroya su mes como un di e musiconan mas stima y aprecia di nos isla y masha admira pa musiconan hoben.

Despues di a lucha cu su malesa pa un periodo basta largo, el a dicidi di cera su wowonan pa semper pa sali asina di su sufrimiento interno.

Interno, pa motibo cu semper el a tene su problema pa su mes. Nunca por a mira un Harry Rodriguez rabia, y durante cu e tabata malo ningun hende tabata sa di esaki tampoco ni di cuanto e lo tabata sufrir.

For di chiquito Harry tabata toca su tambu, cu a bira conga, sigui pa drumset y tur instrumento di percusion y bira bahista.

El a sigui e ruta musical di su tata Lodi Rodriguez (q.e.p.d.) cu tabata masha popular riba nos isla pa su "One man Band". Ademas di Harry, ta Raymond y Henry a sigui e trayecto musical di nan tata, tocando guitarra y baho respectivamente.

For di mucha, Harry cu su bisña Hector "Tico" Quilotte tabata bati nan tambu, drum, quinto, bongo y otro instrumentonan musical. Nan a toca hunto den varios agrupacion cu Harry siguiendo den direccion di percusion y Tico den percusion y cantante.

Di Hapcats cu Harry a toca aden, el a colabora hopi cu Joy Kock cu su "Oruba Sextet" y cu "Super Combo Casino", cual dos agrupacionnan despues di tempo a drenta den fusion bao direccion di Joy Kock y a bira "Latin Power" conoci tambe como "Poder Latino".

Despues cu Musical Time a wordo forma, Harry tabata e man drechi di director musical Elgin Juddan. Harry tabata encarga cu lo ultimo pa cada presentacion, di uniform, atende cu equiponan, e contactonan di e grupo cu tocadornan y musiconan, y semper tabata un di e promenan presente dunando ehemplo na tocadornan hoben di kico ta puntualidad.

Den e grupo musical aki e hobennan tabata yame "Bieuw" cariñosamente y su contesta semper tabata "Bieuw ta caminda". un frase masha popular di Harry tabata: "Bo ta off awe?" y den e grupo e pregunta aki tabata wordo usa den tur sentido.

Na momentonan di conflicto e tabata e negociador cu semper tabata sinta scucha cu tur tranquilidad prome cu e habri boca, y semper tabata haya razon pa su ponencianan. Na momento cu e por a equivocarse, semper e tabata cla pa acepta e equivocacion tambe y duna otronan razon ora cu otronan en verdad tin razon.

Apart di ta amigo, consehero, compañero musical admira, Harry ta conoci tambe como un esposo masha ehemplar y tata masha ehemplar pa su yiu homber stima. Su esposa Lili y yiu Sandy ta sigur cu number di Harry lo keda resona semper den mundo musical di nos isla, pa e persona admirable cu e tabata y pa e respet grandi cu el a impone cu su personalidad y semper a duna y ricibi.

Awe Socotoro di ayera ta yora, pasobra den e Socotoro di ayera, cas di su mayornan tabata e centro musical di Socotoro. Aunke unda tur esnan di Socotoro di ayera ta biba rond di nos isla awe, mañan lo mira tur sigur na San Nicolas ya cu e union cu tabata existi den e habitantenan di "Socotoro di ayera" ta un union cu nunca ta ser kibra.

Kico lo tin mañan na misa, no ta conoci, pero bunita lo ta si por scucha Inky cantando "Hard Self" e favorito di Harry, y pa scucha tambe su bolero preferi "A mi manera".

Mañan atardi na santana, e unico expresion cu nos tur lo por tin lo ta: "Bieuw, awor si bo ta off".

Juby.